

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆ 2009 ԹՎԱԿԱՆԻ ԱՊՐԻԼԻ 23-Ի N 454-Ն ՈՐՈՇՄԱՆ ՄԵՋ ՓՈՓՈԽՈՒԹՅՈՒՆՆԵՐ ԵՎ ԼՐԱՑՈՒՄՆԵՐ ԿԱՏԱՐԵԼՈՒ ՄԱՍԻՆ

ՆԱԽԱԳԻԾ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅՈՒՆ

Ո Ր Ո Շ Ո Ւ Մ

2023 թվականի N -Ն

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆ 2009 ԹՎԱԿԱՆԻ ԱՊՐԻԼԻ 23-Ի N 454-Ն ՈՐՈՇՄԱՆ ՄԵՋ ՓՈՓՈԽՈՒԹՅՈՒՆՆԵՐ ԵՎ ԼՐԱՑՈՒՄՆԵՐ ԿԱՏԱՐԵԼՈՒ ՄԱՍԻՆ

Հիմք ընդունելով «Նորմատիվ իրավական ակտերի մասին» օրենքի 33-րդ հոդվածի 1-ին, 3-րդ մասերը և 34-րդ հոդվածը, «Պետական ոչ առևտրային կազմակերպությունների մասին» օրենքի 12-րդ հոդվածի 2-րդ մասը և 13-րդ հոդվածի 2-րդ մասի կետը՝ Հայաստանի Հանրապետության կառավարությունը *ո թ ո շ ու մ է*.

1. Հայաստանի Հանրապետության կառավարության 2009 թվականի ապրիլի 23-ի «Նորամուծության և ձեռներեցության ազգային կենտրոն» պետական ոչ առևտրային կազմակերպություն ստեղծելու և նրա կանոնադրությունը հաստատելու մասին» N 454-Ն որոշման նախաբանում և հավելվածում կատարել հետևյալ փոփոխությունները և լրացումները.

1) Որոշման նախաբանը «9-րդ հոդվածի» բառերից հետո լրացնել «, և 11-րդ հոդվածի 3-րդ մասի» բառերով.

2) Որոշման հավելվածի 9-րդ, 10-րդ և 11-րդ կետերը շարադրել հետևյալ նոր խմբագրությամբ.

9. Կազմակերպության գործունեության առարկան է գիտելիքահենք տնտեսության ձևավորմանն ուղղված գործուն մեխանիզմների ներդրումը և զարգացումը, գիտատեխնիկական ռեսուրսների շահագործումը:

10. Կազմակերպության գործունեության հիմնական նպատակներն են՝

1) գիտելիքահենք տնտեսությանը միտված նախագծերի ներդրման գործունեության հիմնարկների մշակումը և զարգացումը.

2) պոտենցիալ առևտրային արժեք ներկայացնող գիտական արդյունքի հայտնաբերման և դրա առևտրային պոտենցիալի գնահատման մեխանիզմների մշակումը և գնահատումը.

3) գիտելիքահենք տնտեսության ներդրմանն ուղղված ծրագրերի, այդ թվում՝ հետազոտությունների և մշակումների, միասնական տվյալների բազաների ձևավորումը, վերլուծությունը, հրապարակումը.

4) գիտական արդյունքի իրավական պաշտպանության մասին տեղեկատվության և խորհրդատվության ապահովումը.

5) հնարավոր առևտրայնացման ենթակա տեխնոլոգիաների միջազգային և տարածաշրջանային շուկաների ուսումնասիրությունը.

6) հետազոտությունների և մշակումների խթանմանն ուղղված պետական աջակցության տրամադրում, ծրագրերի մասին իրազեկման և խորհրդատվական աշխատանքների ապահովումը.

7) տեխնոլոգիական գործունեության սուբյեկտներին նորարարական նախագծերի իրականացման, նրանց շահերի պաշտպանության և ներկայացման, մտավոր սեփականության պահպանությանն ուղղված ծառայությունների մատուցումը.

8) գյուտերի, նոու-հաուլի և գիտատար տեխնոլոգիական գործունեության արդյունքի առևտրայնացմանն աջակցությունը և դրանց փոխանցումը գիտատեխնիկական արտադրանքի շուկա.

9) գիտատեխնիկական ռեսուրսների հավաքագրումը, մշակումը, պահպանումը և սպասարկումը.

10) Հայաստանի Հանրապետության, օտարերկրյա և միջազգային ինովացիոն ենթակառուցվածքների, այդ թվում՝ գիտական կազմակերպությունների, բուհերի, տնտեսվարող սուբյեկտների և այլ թիրախային կառույցների հետ փոխհամագործակցության ապահովումը:

11. Կազմակերպությունն իրականացնում է ձեռնարկատիրական գործունեության հետևյալ տեսակները՝

1) հետազոտական և խորհրդատվական ծառայությունների մատուցումը.

2) հետազոտությունների և մշակումների, ինովացիոն նախագծերի մշակման խորհրդատվությունը, կազմակերպումը և վարումը.

3) պոտենցիալ առևտրային արժեք ներկայացնող գիտական արդյունքի առևտրայնացման գործընթացների կազմակերպումը և վարումը.

4) թվային փոխակերպման գործընթացների կազմակերպումը, վարումը, սպասարկումը.

5) գիտատեխնիկական տեղեկատվական ծառայությունների մատուցումը.

6) մարդկային ռեսուրսների զարգացմանն ուղղված ուսուցման, վերապատրաստման և կարողությունների զարգացման ծրագրերի իրականացումը.

7) գիտաժողովների, սեմինարների, ցուցահանդեսների, հանրային այլ միջոցառումների կազմակերպումը և իրականացումը.

8) դահլիճների, սրահների տարածքների՝ վարձակալական հիմունքներով տրամադրումը և (կամ) սպասարկումը.

9) հրատարակչական գործ:□:

3) 17-րդ կետում □և գործադիր տնօրենը□ բառերը փոխարինել □, գործադիր տնօրենը և կոլեգիալ կառավարման մարմինը:□ բառերով:

4) 24-րդ կետի 7-րդ ենթակետն ուժը կորցրած ճանաչել:

5) 24-րդ կետից հետո լրացնել հետևյալ բովանդակությամբ նոր՝ 24.1- 24.13-րդ կետերով.

«24.1 Կազմակերպության կոլեգիալ կառավարման մարմինը խորհուրդն է (այսուհետ՝ խորհուրդ), որը՝

1) լիազորված պետական կառավարման մարմին է ներկայացնում կազմակերպության գործունեության հիմնական ուղղությունների վերաբերյալ առաջարկություններ՝ օրենքով և սույն կանոնադրությամբ նախատեսված՝ կազմակերպության գործունեության բնագավառին, նպատակներին և ինդիքներին համապատասխան.

2) իրականացնում է ընթացիկ վերահսկողություն կազմակերպության գործադիր մարմնի նկատմամբ.

3) հաստատում է կազմակերպության գործադիր մարմնի հետ կնքվելիք աշխատանքային պայմանագիրը, առաջարկություն է ներկայացնում նրա լիազորությունները վաղաժամկետ դադարեցնելու վերաբերյալ, սահմանում է գործադիր մարմնի վարձատրության չափը:

4) սահմանում է կազմակերպության շահույթի տնօրինման ուղղությունները.

5) հաստատում է իր աշխատակարգը.

6) իր կազմից ընտրում է խորհրդի քարտուղարին.

7) հաստատում է կազմակերպության գործունեության միջնաժամկետ և երկարաժամկետ (5 տարվա) ռազմավարությունը, տարեկան պլանը և դրա կատարման ժամկետները.

8) հաստատում է կազմակերպության հաստիքացուցակը.

9) հաստատում է կազմակերպության տարեկան հաշվապահական և ընթացիկ գործունեության մասին հաշվետվություններն ու տարեկան հաշվեկշիռը.

10) ընդունում է որոշում կազմակերպությանը սեփականության իրավունքով պատկանող գույքի արժեքի 20-30 տոկոս կազմող արժեքով ուղղակիորեն կամ անուղղակիորեն գույք ձեռք բերելու, օտարելու և օտարելու հնարավորության հետ կապված խոշոր գործարքներ կատարելու մասին.

11) լիազորված պետական մարմին է ներկայացնում առաջարկություններ կազմակերպության տարեկան ծախսերի նախահաշվի նախագծի վերաբերյալ.

12) եզրակացություն է տալիս գործադիր մարմնի նկատմամբ խրախուսման միջոցներ կիրառելու և կարգապահական տույժեր նշանակելու վերաբերյալ.

13) իրականացնում է օրենքով և սույն կանոնադրությամբ սահմանված այլ լիազորություններ:

24.2 Խորհուրդը կազմված է 7 անդամից: Խորհրդի կազմում ընդգրկվում են՝ Հայաստանի Հանրապետության Էկոնոմիկայի նախարարության (2), Հայաստանի Հանրապետության կրթության, գիտության, մշակույթի և սպորտի նախարարության Գիտության կոմիտեի և Հայաստանի Հանրապետության բարձր տեխնոլոգիական արդյունաբերության նախարարության ներկայացուցիչները՝ համապատասխան նախարարությունների ներկայացմամբ, ինչպես նաև Ինժեներական ասոցիացիայի, «Գիտուժ» նախաձեռնության և «Հայաստանի ազգային պոլիտեխնիկական համալսարան» հիմնադրամի ներկայացմամբ մեկական ներկայացուցիչ:

24.3 Խորհրդի նախագահն ի պաշտոնե Հայաստանի Հանրապետության Էկոնոմիկայի նախարարի տեղակալն է:

24.4 Խորհրդի արձանագրությունները և որոշումները ստորագրում են Խորհրդի նախագահը և քարտուղարը:

24.5 Խորհուրդն իր աշխատանքները կազմակերպում է նիստերի կամ իր անդամների հարցման միջոցով:

24.6 Նիստերը գումարվում են յուրաքանչյուր 4 ամիսը մեկ անգամ և ըստ անհրաժեշտության:

24.7 Խորհրդի նախագահը՝

1) նախագահում է Խորհրդի նիստերը, իսկ նրա բացակայության դեպքում նրա հանձնարարությամբ՝ Խորհրդի անդամներից մեկը.

2)իր նախաձեռնությամբ և (կամ) ստացված առաջարկությունների հիման վրա սահմանում է խորհրդի նիստերի օրակարգերը, կազմակերպում խորհրդի գործունեությունը:

24.8 խորհրդի քարտուղարն արձանագրում է խորհրդի նիստերը, կազմակերպում խորհրդի գործավարությունը:

24.9 խորհուրդն իր արտահերթ նիստերի օրակարգի և ժամկետի մասին առնվազն 3 աշխատանքային օր առաջ գրավոր տեղեկացնում է իր անդամներին:

24.10 խորհրդի նիստերի քվորումն ապահովելու նպատակով անհրաժեշտ է նրա անդամների առնվազն կեսից ավելիի մասնակցությունը: խորհրդի անդամները կարող են նիստերին մասնակցել նաև էլեկտրոնային հարցումների միջոցով:

24.11 խորհրդի որոշմամբ նիստերը կարող են կազմակերպվել էլեկտրոնային հարցումների միջոցով: խորհրդի որոշումներն ընդունվում են, եթե դրանց կողմ է քվեարկել նիստի օրակարգի մասին էլեկտրոնային հարցումների միջոցով 10 օր առաջ տեղեկացված և 7 օրվա ընթացքում իրենց դիրքորոշումը ներկայացրած անդամների պարզ մեծամասնությունը:

24.12 խորհրդի որոշումներն ընդունվում են ձայների պարզ մեծամասնությամբ: Ձայների հավասարության դեպքում նախագահի ձայնը վճռորոշ է:

24.13 խորհրդի նիստերին խորհրդակցական ձայնի իրավունքով կարող են մասնակցել ֆիզիկական անձինք՝ խորհրդի որոշմամբ ըստ անհրաժեշտության:

2. Սույն որոշումն ուժի մեջ է մտնում պաշտոնական հրապարակմանը հաջորդող օրվանից:

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՎԱՐՉԱՊԵՏ**

Ն. ՓԱՇԻՆՅԱՆ